

薑齋先生詩文集

自敘

境識生則患不得熟則患失之與其失之也甯不得此予所知而自懼者也五十以前不得者多矣五十以後未敢謂得一往每幾於失中間不無力爲槩括而槩括之難予自知之抑自提之

詩言志又曰詩以道性情賦亦詩之一也人苟有志死生以之性亦自定情不能不因時爾楚人之謂葉公子高一曰君胡胄一曰君胡不胄云胄云不胄皆情之至者也葉公子高處此殆有難言者甲寅以還不期身遇之或謂予胡胄或謂予胡不胄皆愛我者誰知予情予且不能自言

況望知者哉

此十年中別有柳岸吟欲遇一峯白沙定山於流連駘宕
中學詩幾四十年自應舍旃以求適於柳風桐月則與馬
班顏謝了不相應固其所已彼體自張子壽感遇開之先
朱文公遂大振金玉竊謂使彭澤能早知此當不僅爲彭
澤矣阮步兵髣髴此意而自然別爲酒人故和阮和陶各
如其量止於阮陶之邊際不能欺也

庚申上巳湘西草堂記

六十自定稿

船山遺書五十

衡陽王夫之譔

五言古詩

擬古詩十九首

庚戌

臨歧送遠道春艸生道傍春艸生有時遠行去無方逝水
無西歸游子怨流光高臺多夕風平原足晨霜去者日益
永畱者情益警元雲迷四郊方望不得逞思君褰羅幃滅
燭無餘影棄置良獨難沒生誓幽秉

東園桃李花南國蛾眉女灼灼相矜悅遙遙動心語清歌
不再發舞袖無雙舉昔爲弦上思今爲夢中聚芳菲非我

春爲歡復何許

灼灼三春風
縈縈楊柳色
年少去我徂
芳菲不再得
遲我心所欽
良書寄懷憶
迢遞千里間
神皋有仙宅
朱鳳遺清音
青天回羽翼
玉軫動鳴琴
素月輝相卽
髣髴垂丹梯
雲籥降消息
願言欣相從
含情無終極

殷勤重殷勤
置酒遙相期
華燭搖虛牖
流光動哀絲
中觴促密坐
欲言還自疑
懷情不忍散
勸勉當及茲
爲歡託榮觀
結愛在新知
飛蓬非久要
胡爲守枯枝
詞終起相謝
微生命有涯

客從淇水來
導我遊朝歌
廣陌聚高居
冠蓋影綺羅
良夕

奏哀絃繁聲驚素波師延亡千載遺怨何其多黃鵠感其
音羣飛以阿儻高樓離思女長夜顰青蛾聞者無厭情歌
者益以和清琴有希音吾心將如何

日南有歸客問訊珊瑚枝海水深不測飄零無反時相見
旣無端相憶無與知唯持憔悴心畢命以爲期

太陽斂西暉纖月出雲際夕風改晨色羣星相連綴征鳥
懷故棲遙天方遠逝巢燕依梁宇流螢漾池砌念我結髮
遊納交相砥礪去者日以疎遺我成孤贅宵露不及晨餘
霜無久麗自非金石心誰能永匏繫

梧桐生井幹桐葉落井中結穢事君子飛蓬附秋風秋風

有息時飛蓬委荒阡間關逐君行中道悲棄捐依君日苦
短別君日苦延傷哉驚颿集吹此雨絕天日沒羣星出長
夜未有端

桂樹繁晨霜芳滋久不渝采之無所贈不忍置路隅懷袖
經歲年中心良自殊殷勤自疇昔誰爲愛斯須

滌滌秋字清泫泫華露滋冉冉弦月微杳杳雙星期良辰
既不屢終夕亦有涯脈脈相視間爲歡還自疑未必經年
中綢繆無轉移

日落登崇岡顧望青天高四維何茫茫浮雲但蕭騷羣動
旣非一吾身若秋毫自非精誠徹蠕動徒已勞精魄無固

存奄忽成焄蒿及今百年內何者終吾操

所思不可見所怨不可移忽如飄風集貿貿何所之平生
交與好長逝相追隨中野飛燐光白日爲之迷函意以永
世千載將誰知

南山崔以鬼上與浮雲連俯視何浩浩飛鳥翔其間延眺
須臾中心目淒以閑置身如流波旦夕空百端焉能役心
志隨物增憂煩疇昔遨大梁結交多英賢千里不相棄良
書託歸翰寶玦白玉光繫以雙金環佩之四座驚徬徨發
長歎所歎非偶爾白璧當自完

陽春二三月綠艸被修路青林無鮮華號鳩互晨暮淒彼

泉下人不知春風度驅驅無返轍誰者爲新故往古旣復
然非我獨憂懼天物各推遷胡爲滋驚怖慮苦不得甘蚤
計良已誤滅性以求眞浮光棲月露鼎鼎百年中含情抱
貞素

古人不可期今人當奈何對酒乍相忘援琴發清歌適意
方在茲憂患徒相加憤世而忘己吾生亦有涯商山采芝
人跡邇心自遐

和月春已徂林鳥有餘聲落英無返顧流覽怛中情寶刀
垂鞶帶昔我何所營中宵不自戢髣髴感精靈邂逅良人
姿執手相徂征心好自旖旎隨風飄長纓雖非思所臻乍

觀亦不驚願言託白首疇云中路傾綢繆不相釋屢顧念
平生懷抱申此夕感之雙涕零

白月流素天微霜滿空際開軒極遠目清霄何迢遞仲秋
元鳥歸季秋陽鴈至染絲弄機杼縱橫成錦字上有永別
離下有金石誓不知將寄誰綢繆結封識經年藏寶篋置
之不忍視

昔我遊日南中道至合浦池水碧以寒翬鷺莫能睹得此
徑寸珠云自鮫人所緘以金泥封藉之龍文組中夜投君
懷當知寸心苦

清風吹華鐙明星啟東方起步中庭間形影相徬徨夙昔

志遠遊遲暮迷津梁滅燭從假寐欲罷固難忘浩歎以徹
旦不知淚霑裳

擬阮步兵詠懷

出門何所適極目延雲容白月照廣川綠眴生清風飛鳥
去天末蕭條無餘蹤置意良獨難歸來扣哀桐

阿環握靈符翩然降桂宮執戟侍清宴佩玉相從容嘉會
雖迢遞畜意無終窮二八妙娥嬋箏璫盪虛空穆耳注心
感歎焉返閨風懷情不再覲徒乃見狡童萬年獨離傷精
爽誰爲通

涼風西南來吹此浮雲興連蜷相異態奄忽如有憑日暮

靈雨飛消釋如春冰步上商南山揮手謝太清肝膽一胡
越百年非我生明滅隨須臾吾心固不能

石隕睢陽都夙昔爲明星頃刻不自信哀樂異其情韶風
榮腐艸春霰摧初英去日亦已往來日自多驚唯有王子
喬凌空吹玉笙

結土苦不早黃金何足言遠聞悲歌士屠狗近居燕擘衣
欲就之時命忽我遷蟠泥中道困蛟龍無羽翰歸休南山
下日月如流丸棄置平生心荒忽如秋烟

鸞鳥棲開明玕琪映毛羽四日不匿暉永夕炫金縷深心
非世知有時戴戈舞覽德無良期裴回生憤怒慈儉以全

身高深定何補

芳春去我遠九夏行將遷靡艸閱炎日鮮蔓無久延歸禽
避飄風深林相哀喧披衣視河漢惻愴悲高天當時非所
謀及今良固然

白日閱寒雲長夜復陰雨夕螢流涇光因風歛相聚奔獸
不違林驚禽亦懷侶下土情不深目迎心已許悲歌難自
固上蔡餘酸楚失弓原郢客逐日非夸父要領誠不惜孰
爲同艸腐

汎舟浮湄水逶迤青楓林湄水去不息言下湘江潯停櫂
長太息明月照我衿天宇曠廣野平原氣蕭森夕鳥暝不

飛游魚喧籟陰寸心不自得何況飛與沈

鄴臺閼新宮高陽矜廣宅游冶相紛奔追歡倒屣舄黃雀
在枌榆取之若芥珀華山有高士燒金方結客舒卷無淺
心靈蛻託仙迹

燕臺多高風易水揚洪波白日照綺疏冠蓋相經過蹕厲
古今間感慨何其多望諸無返駕洎上計復訛黃金臺已
蕪北望空山阿宋子迹云遠誰爲紹悲歌

蔓艸縈咸陽云是阿房宮雛鳳復雙飛莫辨雌與雄山河
旣綢繆宴處時從容挾彈鳴金鏐垂楊騎青驄意氣生豪
族芳塵散春風努力拾新翹無言恤飛蓬秉燭繼白日爲

歡無終窮

長夏生景風飄然過我墟蓬居困杲日頽影過桑榆延睇
望廣天胡爲自攣拘西臺有餘哀聊城無報書生我自有
天憔悴與之俱

白日迴南轅艸木芸以黃時改心易驚哀情隨大荒遠視
無所懷但念有悲涼西暉徐以下微風過墟岡庭宇曠蕭
森披帷延星光

早歲好詞賦文酒相追隨引譽動當時將爲名在茲撫劍
遊廣都悲歌歸山涯元冥共白日何者不吾欺驅馬上高
岡咫尺生峯欹乃知楊公歎非緣道多歧

湘水千里來東下巴邱湖迢遞連廣野青山闕幽墟雲氣
浮遠白西南接蒼梧落日登迴岡飛鳥去已孤暝色沒高
樹墟烟下平蕪俯仰求寸心不知意所俱姣女多情向烈
士無旁趨皎日照此懷行歌一歔歔

悠悠青天高不知生所終巫咸已上天欲訴將奚從但見

大壑間

大壑沅湘者
舊集作邱壑

日暮生清風驚魚跳淥水秋蛩吟蘭

叢懷我心所欽邂逅相迎逢

浮雲起東南悠然驚西北馱影無淹畱凝望滋迷惑前者
旣蕭散後來空閔默豈爲仰觀者伋迹從察識稚鳥空翔
飛馮風鼓羽翼達人知其微馳驅無軌則蘋末生輕風孤

心自相得

念我心所歡遠在玉山岑戴勝冠崔嵬文鸞奏知音妙藥
青鱗脂薰風生瑤琴日夕延伫之綿邈心淫淫三五明月
滿光暉發雲林神爽一相接攜手連謳吟企望亦不遐悲
哉年歲侵

楚人得亡弓塞叟有歸駒乍爾亦爲歡達人哂其愚明月
照形影惻惻夫何如同風颺秋毫雷轉造化樞罔彼柔曼
子猶知泣前魚元珠握重淵金石終不渝

心顏誠自我雲容悲素蒼耿耿霜月霽長嘯驚八荒青天
有鳴鴻孤飛不成行聞其哀噉音疑爾悲稻粱所志在鸞